



အပိတပိတၢ်
AWIG-AWIG

ၣ်ဒါတၢ်အဒါတၢ်ဒါတၢ်
DESA ADAT PENASAN

ၣ်ဒါတၢ်အဒါတၢ်ဒါတၢ် - ပီတၢ်တၢ်ပီတၢ်
DESA ADAT PENASAN - PERBEKELAN TIHINGAN

တၢ်ဒါတၢ်အဒါတၢ်ဒါတၢ် - တၢ်ဒါတၢ်အဒါတၢ်ဒါတၢ်
KECAMATAN BANJARANGKAN - KABUPATEN KLUNGKUNG

ၣ်ဒါတၢ်အဒါတၢ်ဒါတၢ်

TAHUN MASEHI 1982

MURDA CITA

OM SWASTYASTU.

Sangkaning wara nugrahan Ida Sang Hyang Parama Kawi, punika mawinan sida kasurat Awig-awig Désa Adat puniki madasar antuk suara gilik sadulur saha cita nirmala.

Awig-awig gumanti wantah pinaka sendi miwah saka, maka pamikukuh desa adaté midabdabin kalih nyanggra kasukertan krama desa rawuhing kulawarga pawonganné, kajangkepin antuk Dharma Prawertinnia ngrajegang Sang Hyang Aji Agama manut dresta.

Siwosan ring dresta inucap pamekas Pancasila, Undang-undang Dasar 1945 miwah sahanan peraturan-peraturan Negara Republik Indonesia taler tan kalempasin antuk awig-awig puniki.

Moga wastu kasidhan mikolihang manut patitis nyane.

OM, SHANTI, SHANTI, SHANTI OM.

DAGING BUKU AWIG-AWIG DESA ADAT PENASAN

MURDA CITA.....	pra	1
DAGING BUKU AWIG-AWIG DESA ADAT PENASAN.....	pra	2
SARGA I ARAN LAN PALEMAHAN.....		1
SARGA II PATITIS LAN PAMIKUKUH.....		1
SARGA III INDIK SUKERTA TATA CARA.....		2
PALET 1. INDIK KRAMA LAN WARGA DESA.....		2
PALET 2. INDIK PRAJURU.....		8
PALET 3. INDIK PARUMAN.....		11
PALET 4. INDIK KULKUL.....		14
PALET 5. INDIK DRUWEN DESA.....		16
PALET 6. SUKERTA PAMITEGEP.....		17
KAPING 1 KARANG TEGAL LAN CARIK.....		17
KAPING 2 PEPAYONAN.....		19
KAPING 3 INDIK WEWALUNGAN.....		19
KAPING 4 INDIK BAYA LAN DUSTA.....		20
KAPING 5 PANGUNYAHAN BANJAR.....		22
SARGA IV KASUKERTAN TATA CARA AGAMA.....		22
PALET 1. INDIK KAHYANGAN DESA.....		22
PALET 2. INDIK RESI YAJNYA.....		27
PALET 3. INDIK PITRA YAJNYA.....		29
PALET 4. INDIK MANUSA YAJNYA.....		34
PALET 5. INDIK BUTA YAJNYA.....		35
SARGA V INDIK PAWIWAHAN.....		37
PALET 1. INDIK NYAPIHAN.....		40
PALET 2. INDIK SENTANA.....		42
PALET 3. INDIK KEWARISAN.....		44
SARGA VI WICARA LAN PAMIDANDA.....		47
PALET 1. INDIK WICARA.....		47
PALET 2. INDIK PAMIDANDA.....		47
SARGA VII NGUWAH KALIH NGUWUHIN AWIG-AWIG.....		49
SARGA VIII PAMUPUT.....		50
LEPIHAN I.....	psc	52

SARGA I

ARAN LAN PALEMAHAN

PAWOS 1

1. Desa Adat puniki mawasta: Desa Penasan.
2. Wewidangan palemahan Desa Penasan puniki ngawengku tanah pakarangan Desa saha tegal carik druwen Desa mawates nyatur kadi ring sor:
 - 1). Wates sisi wetan : Toya Jinah.
 - 2). Wates sisi kidul : Carik Tempek Bekul.
 - 3). Wates sisi kulon : Tukad.
 - 4). Wates sisi lor : Carik Tempek Pegulingan sisi kelod (Pura Hyang Api).
3. Desa Penasan puniki pupulaning ayah krama Desa, krama ngarep, krama pangele, krama kaputungan, sinanggeh krama Desa, utawi krama patus agung.
4. Desa Adat Penasan ngawidangin tigang banjar.
 - 1). Banjar Penasan Gede.
 - 2). Banjar Penasan Sangging.
 - 3). Banjar Penasan Mungguna.

SARGA II

PETITIS LAN PAMIKUKUH

PAWOS 2

Desa Penasan Puniki ngamanggehang pamikukuh Desa makadi

1. Pancasila.
2. Tri Hita Karana manut tatwaning bhuwana agung.
3. Undang - Undang Dasar Republik Indonesia tahun 1945 ping ajeng manut ring pasal 18.

PAWOS 3

Luwir Patitis Desa Penasan puniki kasurat sakadi ring sor:

1. Mikukuhin saha ngrajegang Sang Hyang Agama.
2. Nginggilang tata prawertining meagama.
3. Ngrajegang kasukertaning Desa Krama saha kasukertan Pawonganniya sekala lan niskala.

SARGA III

INDIK SUKERTA TATA CARA

PALET 1

INDIK KRAMA LAN WARGA DESA

PAWOS 4

1. Sane kabawos Warga Desa Penasan inggih punika:
Sahananing jatma sane jumenek ring pawidangan Desa Penasan, saha satinut ring sahananing awig-awig Desa lan pamargin Krama Desa Penasan.
2. Sane kabaos Krama Desa Penasan sane sampun marabian, ngamong karang, wiadin tan ngamong karang, nyungsung kahyangan Desa, tur satinut ring daging awig-awig Desa Penasan.
3. Jatma mawed saking Desa / Banjar Penasan, sakewanten magenah ring Dura Desa malarapan ngrekeh pangupajiwa, lan wigumannya kangkat nedunin makrama Desa Adat Penasan yan mungguing swadarmannya mamut parareman Desa / Banjar.
4. Sajaba punika utawi satios inucap ring ajeng kabaos tamiu.

PAWOS 5

Krama Desa Penasan kapalih dados 3 (tigang) soroh, luwire

1. Krama ngarep: ngaran krama Desa sane ngamong karang ayahan Desa.
2. Krama kaputungan ngamong karang luwire:
 - 1). Balu, balu luh lan balu muani.
 - 2). Sapian / nyapian palas makurenan.
 - 3). Tapukan katinggal padem antuk yayah rena.

PAWOS 6

Kawit dados Krama Desa wenten tigang soroh luwire:

1. Mawed jumenek ring Desa Penasan saking kaluhurannya.
2. Saking pangrawuh saking Desa siosan jumenek ring Desa Penasan malarapan saking ngrekeh pangupa jiwa miwah sane siosan, sangkaning patilar rahayu saking desanya.
3. Malarapan antuk pawiwahan, pratisentana wit saking ayat 1, miwah ayat 2, ring ajeng.

PAWOS 7

Panemaya tedun makrama desa:

1. Tedun Makrama Desa malarapan pawiwahan utawi ngrekeh pangupa jiwa utawi patilar rahayu saking Desa siosan, katedunang makrama Desa risampung tedun makrama Banjar Patus.
2. Ngranjing Makrama Banjar Patus kamargiang manut kawentenan pamargi kadi ring sor:
 - 1). Yan nyelosin pamargin ayahan reramannia padgata kala / pramangke, tan kawentenang paneragan.
 - 2). Siosan nyelosin ayahan, nyantos 6 (enem) sasih ngawit nganten katedunang makrama tur kadulurin antuk paneragan.
 - 3). Yan mawit saking pangrawuh / utawi saking patilar rahayu saking Desa siosan, mawaneng tigang sasih saking panunasannyane, kadulurin antuk supeksa pailikitaan ring prajuru Desa,
3. Sang pacang tedun makrama Desa Patut:
 - 1). Sumanggup nyiwi Kahyangan Desa Penasan.
 - 2). Satinut ring awig-awig, paswara lan pamutus pakrama Desa Penasan.
 - 3). Siosan ring nyelosin ayah rerame keni pamopog panaub jinah manut pararem banjarnyane sowang-sowang.
 - 4). Sang tedun madesa saking pangrawuh Desa siosan, keni pamogpog wewangunan druwen Desa Geng arta manut patutaning pararem Desa.
4. Sane patut nyelosin ayah-ayah krama Desa:

- 1). Sentana lanang sane pinih dumun madrue istri.
- 2). Yan pada ubayan ring sesemetonannyane taler keluarga sentana lanang, sane marabi pinih dumun manut pasubayanniya tur polih lelugrahan antuk bendesa adat.
- 3). Nyelosin ayah krama yan sampun kasungkemin antuk sang kaslidiin tur kasyahang antuk Bendesa Adat.

PAWOS 8

Sahanan Krama Desa keni ayah-ayah pinaka darmaning Warga Desa luwire:

1. Krama ngarep ngamarginin ayah Krama ngarep.
2. Krama pangele ngamarginin ayah krama pangele.
3. Krama Kaputungan ngamarginin ayah krama Kaputungan.
4. Warga kekuwuban utawi roban, utawi dandanan waris saking krama Desa kadi ring ayat 1, 2 lan 3 ring ajeng sane sampun deha truna (patut ngamiletin Sekaa Truna Truni) ngamarginin ayah roban utawi ayah truni truni (mawasta panyalah), manut wigunannya luwir ipun Sekaa Gong, Sekaa Kidung, Pregina.
5. Warga kekundulan yan sampun mayusa pitulas warsa kengin kamarginin ayah-ayah krama tan pacontoan.

PAWOS 9

Peson-peson kalih urunan ring Krama Desa wenten kadi ring sor:

1. Krama ngarep kalih krama keni pepeson miwah paturunan mamungkul.
2. Krama kaputungan keni peson-peson kalih paturunan polih karingan manut kawentenan pialangnyane tur nganutin daging pamutus parareman.
3. Banjar patus keni pepeson ring Desa manut wiguna, reh banjar patus inucap maka tangan sukuning Desa.
4. Prade ring desa wenten pakaryan sane abot, sane patut karomba kengin patut karomba antuk sahananing Desa sami.

5. Prade wenten sinalih tunggil krama tan nganutin kadi paswaraning bawos ring ajeng wenang krama inucap keni pamidanda manut pararem.
6. Asapunika taler ring sang mamurug paswaraning bawos lianan wenang katibakin pamidanda.

PAWOS 10

1. Swadarmaning Krama Desa manut ayah-ayah Krama Patus Desa lan Banjar patus luwire:
 - 1). Dreda atuang ring Desa.
 - 2). Manut tur satinut ring daging awig-awig lan paswara manut peputusaning pararem.
 - 3). Tan maren ngutsahayang mangda Desane prasida nyujur manut petitis.
 - 4). Lumaksana tur ngamargiang sahanan Prajuru, kalih dedawuhan Pemerintah Agunge.

PAWOS 11

2. Swadarmaning Tamiu:
 - 1). Sane kabaos tamiu, sang majenek / Jumenek marerepan ring Desa Penasan sanistane awengi, upami wit saking.
 - 1). Malelungan.
 - 2). Sesudian Desa utawi Pemerintah.
 - 3). Duduk-dudukan.
 - 4). Masundulang raga.
 - 5). Kadang warga utawi keluarga antuk sinalih tunggil krama.
 - 6). Ngrereh pangupajiwa miwah sane siosan.
 - 2). Swadarmaniya:
 1. Ninutin ring sapa margin kerta lan tata kasutreptian Desa Penasan.
 2. Nganutin tata cara Bebanjaran sane ngwidangin.
 - 3). Krama sane nampi tamiu patut atur supekse, ring prajuru Desa,
 - 4). Tamiu sane sampun marabian tur lanang wadon sareng jumenek magenah ring Desa Penasan jantos sasihan suene patut katedunang makrama Desa, utawi kakenniin panaub pasewaka krama.

- 5). Tamiu sesudian Pemerintah sane jumenek ring Desa Penasan sareng rabinnyané jantos sasihan keni sumbangan suka duka ring banjar sane ngwidangin.
- 6). Yan ana wong saking Dura Desa utawi tamiu tan nganutin kecap ring ajeng utawi malaksana dus kerti patut keni pamidanda utawi katundung saking wewidangan Desa Penasan.

PAWOS 12

Pamargin Krama ring Desa Penasan manut pamargi sane sampun kamanggehang saking dresta nganutang kawentenan linggih krama kamanggehang wenten pepalihan pamargi sakadi mungguh ring sor: Yan marep ring sang kapialang utawi manut wigunan Krama kawentenang leluputan makadi ring sor:

1. Sahanan krama Desa keni pamargi lan ayah-ayah kalih kekenan sakadi kasurat ring ajeng (pawos 8, 9, 10)
2. Leluputan - leluputan pamargi lan ayah - ayahan, kawentenang marep ring:
 - 1). Para pamangku.
 - 2). Sang utawi Krama sane cedangga banget lan sungkan tahunan.
 - 3). Krama balu.
 - 4). Krama ubuh / tapukan.
3. Leluputan inucap manut ring sor:
 - 1). Para Pamangku Desa luput ayah-ayah lan reramuan miwah urunan yajnya.
 - 2). Krama sane cedangga banget lan sungkan tahunan polih leluputan manut alangannya.
 - 3). Krama balu polih leluputan manut kawentenannya.
 - 4). Krama ubuh (krama alit katinggal yayah-reña) ngamarginin sakadi Krama Tapukan.

PAWOS 13

Petias utawi olih-olihan Krama Desa, sakadi ring sor:

1. Wenang polih sesayuban utawi pangayoman saking prajuru Desa lan krama Desa marep ring kasutreptian pawonganniya, padruwennya utawi yajnyanniya, kalih polih pitulung rarombayan saking Krama Desa rikala kakewehan, kaduhkitan, katiba baya, karya abot utawi siosan manut petitis Desa.

2. Wenang kabawosin tur kapidabdabin olih Prajuru Desa tur katiwakin pamutus sahananing wicaranniya.
3. Wenang nyarengin parareman Desa lan Banjar, tur saha wenang mastikayang daging kaputusan parareman Desa kalih banjar.
4. Wenang nyudi kalih kasudi dados prajuru. Wenang polih papuangkidan lan leluputan manut kawentenanniya kalih kaperluan ipun manut daging pararem, luwir ipun:
 - 1). Mapuangkid sangkaning: sakit, matepetin, mayajnya, maleluasan utawi wenten karya perlu tiwosan.
 - 2). Nyade ngamademang ayah-ayah manut saka jalaranniya pacang nyada.
 - 3). Luput / polih leluputan sangkaning dados prajuru, kasudi antuk kawigunanniya wiadin leluputan sangkaning kawentenan siosan.

PAWOS 14

Wusan dados Krama banjar, sakadi ring sor:

1. Wusan ngamarginin krama banjar sakadi ring sor:
 - 1). Santukan padem pegat ayah-ayah.
 - 2). Sangkaning kesah saking Desa Penasan, kadulurin surat katerangan / ilikita saking Prajuru Desa.
 - 3). Sangkaning nyada, manut saking jalaranniya.
 - 4). Sangkaning kawusanang kacabut pipilnya antuk i krama banjar wit saking banget iwangnya.
2. Wusan kalih kawusanang antuk ikrama Desa panemayanniya padgatakala utawi ngawit putusan parareman.
3. Sang wusan makrama inucap tan kawenang polih pah-pahan druwen banjar, yadiastun wenten drue marupa jinah kas. Sajawaning sangkaning wenten krama suka, ikrama banjar genah ipun pecak sareng makrama.
4. Mawali malih makrama banjar:
 - 1). Sangkaning rahayu, tan kapatutang keni panaub wewangunan druwen banjar. Wong inucap patut keni pakaad mara; sakewanten yan wenten jinah kas patut kataubin.

- 2). Yan prade pacang wusan sangkaning tan rahayu utawi kacabut pipinya malarapan tan rahayu, mawali malih makrama banjar, wang inucap patut kakeninin jinah ular alir manut putusing parareman tur panuku jinah kas druc.

PALET 2

INDIK PRAJURU

PAWOS 15

1. Desa Adat puniki kaenterang antuk Prajuru ngaran Bendesa Adat Penasan, pinaka pangenter Desa Adat lan Krama Patus.
2. Krama Banjar kaenterang olih Klian Banjar.
Geguat pacang dados prajuru Desa utawi Banjar patut majalaran sakadi ring sor:
 - 1). Mawiwit saking krama banjar lan krama Desa Penasan.
 - 2). Mayusa sampun manut pacang ngamarginin dados prajuru (\pm 30 tahun).
 - 3). Kaadegang malarapan antuk gilik peputusan pamilih kalih parareman krama.
 - 4). Kadulurin antuk nunas piuning lan waranugraha ring Kahyangan Desa Penasan.
3. Krama Banjar Patus Alit olih Klian Banjar.
4. Wewenang wiadin sengker dados prajuru luwire:
 - 1). Ngawit saking pangesahan krama.
 - 2). Mawaneng sajeroning limang warsa.
 - 3). Yan sampun puput mesenger, limang warsa pamargin prajuru punika patut kaserahang ring krama tur mangda kawentenang sesudian Banjar.
 - 4). Sang pecak kaangkat dados prajuru tan dados malih kasudi pramangkin.

PAWOS 16

Bendesa kalih Prajuru sane nyanggra desa luwire:

1. Bendesa Adat Desa Penasan kasanggra antuk:
 - 1). Prajuru sane kasudi olih banjaranyane soang-soang.

2. Wawilangan panyanggrane manut abot dangan kawentenan pamarginnya. Palet-paletan pamargine manut Desa, kala, patra, utawi manut pactangan wewarisan prajuru utawi Klian Banjar.
3. Sajeroning ngenterang kasukertan niskala, Yajnya ring Kahyangan Desa utawi ngupakara kasucian Kahyangan Desa lan sahanannya kaenter olih bendesa adat. Katuntun olih Ida Sang Sulinggih (Ida Pedanda), Pamangku Desa lan Parisada Hindu Dharma.
4. Bendesa kasanggra olih Klian Banjar.
5. Para pamangku patut mingsinggihang pamonganniya ring Kahyangan Desa saha patut kasanggra olih prajuru istri lan jro mangku istri.
6.
 1. Bendesa Adat katuntun antuk Ida Sang Sulinggih (Ida Pedanda) kamanggehang pinaka kerta desa.
 - 2). Kerta Desa wenang matetiwak pamutus lan pamidanda marep ring krama desa ring wicara nganinin indik adat, susila lan agama.

PAWOS 17

Swadarmaning Prajuru Banjar:

1. Swadarmaning Bendesa Adat luwire:
 - 1). Ngenterang sahananing pamargi daging kecap awig-awig, paswara lan putusan parareman banjar.
 - 2). Nuntun tur ngenterang Krama Banjar rawuhing krama banjar, ngupadi kasukertan Krama Banjar manut petitis.
 - 3). Mawosin kalih niwakin pamutus utawi wewirasan arep wicara warga Banjar manut petitis lan awig-awig banjar.
 - 4). Maka duta banjar pacang mabawos ring sapisira ugi.
 - 5). Maka pangoreg Banjar / Pemanggala ritatkala mamikukuh Banjar lan mamikukuh pamargi Adat kalih awig-awig. Prade wenten wong dura cara kalih pangrusak banjar siosan.
2. Ritatkala ngenterang pamargi Desa Krama, I Bendesa Adat patut ngwentenang:

- 1). Wewirasan ring I Prajuru Desa siosan kalih prayogya sane taler ngawidangin warga Desa mangda tan tungkas pamargi. Upami ring; Perbekel, Pekaseh miwah sane siosan.
- 2). Ngwentenang paetangan galah pangala Desa mangda warga desane polih galah-galah paetangan pacang ngupadi pangupa jiwa, ngutsahayang pangweruh kalih usaha niri-niri sane siosan.
3. Prajuru siosan swadarmanniya:
 - 1). Pateh manut swadarmaning Bendesa, nganutin paetangan wewengkon pawidanganniya kalih wigunanniya.
 - 2). Pinaka tangan suku kalih pangromba pangarep olih I Bendesa.
4. Prade I Pajuru iwang sesana utawi nglinyokin druwen Banjar, keni kabuktiang kaiwanganniya antuk para kramane, punapi malih yan banget tempal ring daging awig-awig Banjar lan paswara patut keni pamidanda nikel ring pamidanda kaiwangan krama siosan. Patut keni panaur karugian arta, marep ring banjar manut pararem, saha kengin kararianang dados prajuru.
5. I Prajuru sane kasisipang tan kengin ngenterang kalih nuntun parareman duk pararem krama punika.
Peparuman banjare / Kramane katuntum antuk Prajuru siosan utawi ngwentenang gegilihan panitya pararem.

PAWOS 18

PATIAS PRAJURU BANJAR LUWIRE:

1. Saluwiring kakenan rerambuan, kalih bebaktan polih leluputan.
2. Polih cenengan saluwiring duman lan bebas saking kekenan piodal utawi paturunan.
3. Polih ulih-ulihan siosan manut kawentenan pamargi manut pararem banjar.
4. Miwah petias-petias sane siosan.

PAWOS 19

NGENTOSIN PRAJURU LUWIRE:

1. Prajuru banjar kagentosin majalaran:

- 1). Sampun putus waneng / sengker dados prajuru utawi sampun panemaya.
 - 2). Kalayonan sang prajuru lampus utawi seda.
 - 3). Tan sida ngamargiang pamargi dados prajuru, sungkan tahunan utawi pialang abot sane siosan.
 - 4). Pinunas ngraga tur sampun kalugra pinunasniya antuk banjar.
 - 5). Kararyanang antuk Krama duaning iwang pamargi.
2. Ngentosin utawi ngararyanang Prajuru patut kararemin antuk krama banjar sajeroning parareman banjar, tur kawentenang pangulikitan sane keesahang tur kasaksinin antuk prajuru sane luhuran.

PALET 3

INDIK PARUMAN

PAWOS 20

1. Peparuman ring banjar-banjar Penasan panemayanniya kadi ring sor:
 - 1). Paruman manut panemaya luwire:
 1. Paruman banjar nyabran Tumpek.
 2. Paruman banjar nyabran Kasanga.
 - 2). Paruman Padgata, manut kawentenan utawi manut Desa Kala Patra.
 - 3). Paruman prajuru kawentenang paling doh nyabran enem sasih, sakewanten yaning wenten pamargi mabuat, paruman punika padgatakala manut tetujon kalih wiguna.
 - 4). Sangkepan Deha Truna manut wiguna (sekaa gong, Hansip).
2. Yan pesamuan / parareman sampun panemaya utawi patokan tan kawentenang pangarah. Yan paruman Padgata kala patut ngamargiang arah-arah.
3. Sangkepan wiadin Peparuman Banjar patut madudonan kadi munggah ring sor:
 - 1). Kadulurin pangarah prade padgatakala.
 - 2). Macihna antuk swaran kulkul manut pawos 24.
 - 3). Prasida lumaksana risampune katedunin antuk inganan atengah langkung saking krama sane patut ngamiletin.
 - 4). Sang pecang parum patut abusana adat akampuh tur tan wenang agegawan.

- 5). Tan maren ngarcana Ida Begawan Penyarikan maka serana antuk banten cane. Utamannyane ngarcana Ida Sang Hyang Widhi Wasa mangda Ida Asung wara nugraha, mangda sahanan daging tetujon parumane prasida kaapti tur rahayu.
 - 6). Pangawit parum patut nyacak dumun, riwusnya sangkep patut keni dedosan manut pararem.
 - 7). Pamutus bebaosan kausahayang malarapan gilik sadulur, pada arsa krama sami. Bilih tan prasida gilik sadulur, swara sasauran sane akehan kabaos patut, kamargiang nanging putusan punika taler mangda anut utawi tan banget lempas ring pamatut agunge, minakadi Pancasila lan Undang - Undang Dasar Tahun 1945.
 - 8). Putusan paruman punika sinanggeh pangwirasa, sane wenang nyelem putihang utawi maka panguger geguat tata pangenter Banjar manut drestane.
4. Prade wenten kabaos sane buat:
- 1). Tan prasida molihang kaputusan utawi tan kararemin I prajuru patut ngalihang paruman ring bebaosan sane siosan.
 - 2). Bebawos punika patut kawaliang matah utawi kewantunin ring peparuman sane ukuran.
 - 3). Prade taler tan prasida polih pamutus lan prasida manggeh kadi kaptiang, peparuman wicara punika manggeh sakadi wicara abot ring banjar, tur patut katunasang pamatut ring Pemerintah Agunge, sane niwakin pamutus manut daging wicara inucap.

PAWOS 21.

1. Sane patut kasiarang ring paruman banjar:
 - 1). Munjuk lungsuring krama makadi ayah-ayah.
 - 2). Saluwir kalih sulur arta brana drue.
 - 3). Indik pamargi sane wus kaputusang utawi wewangunan.
 - 4). Rencana prajuru nganinin indik usaha kapungkur.
 - 5). Sahanan wicara saha pamutusniya.

2. Sahanan kekasiarang ring ajeng, katitenin saha katiwakin pamutus antuk paruman krama soang-soang.
3. Pamutus parareman banjar patut tan lempas ring awig-awig tur sinanggeh pararem maka pamitegep awig-awig banjar.

PAWOS 22

1. Sangkepan prajuru magekuat kadi ring sor:
 - 1). kawentenang sanistane 6 (enam) sasih apisan nanging yaning wenten bawos buat, kengin padgatakala manut wiguna.
 - 2). katuntun antuk Bendesa Adat utawi Klian Adat.
 - 3). Kasarengin olih prajuru banjar muang sahanan Klian Banjar.
2. Tetujon peparuman prajuru inggih punika, ngrincikang pangrencana, tata upaya sane patut kanggen ritakala pacang nglaksanayang sakaluwiring pamargi, usaha utawi rencana pawangunan ring banjar.
3. Pamutus sahanan rencana, punapi malih rencana sane pacang niwakin kenan-kenan utawi pamargi ring krama, durung patut kalaksanayang, sadurung kasungkemin tur kapikukuhang antuk paruman banjar manut dudonan.
4. Pamutus parareman prajuru, mawit saking pituduh sang miweng buana, utawi mawit saking paswara krama banjar sane rihinan.

PAWOS 23

SANGKEPAN SEKAA KADI RING SOR:

1. Sangkepan / sekaa-sekaa kawentenang manut bebuat kalih wigunanniya sowang-sawang.
2. Panamaya padgatakala.
3. Nangken ngwentenang sangkepan utawi pacang ngardi kaputusan sangkepan / patut atur supeksa riyin ring I Prajuru Banjar, prasida mangda tan lempas kadi petitis awig-awig kalih pawos ring ajeng.

INDIK KULKUL

PAWOS 24

1. Kulkul utawi gendongan ring banjar Penasan patut wenten dudonanniya prasidatan baur swaranniya kadi ring sor:
 - 1). Kulkul banjar Penasan.
 - 2). Kulkul Pakaseh ring soang-soang Pekaseh.
 - 3). Kulkul Sekaa Dadya.
 - 4). Kulkul sekaa-sekaa sane siosan.
2. Swaranning kulkul inucap kaanggeh pinaka swaraning Banjar lan sekaa, satmaka atur utawi dedauhan mawit saking krama mantuka ring krama sami.
3. Tabuh tetepakan kulkul sowang-sowang inucap ring ajeng pastika manut ring tatujonniya, tur manut ring pasubayan krama.
4. Pamargi-pamargi sane patut macihna swaran kulkul utawi sane patut nywarayang kulkul luwire:
 - 1). Pacang parum.
 - 2). Pacang tedun makarya ring banjar utawi ngayah ring Pura.
 - 3). Pacang nandur utawi ngampung.
 - 4). Pacang ngrentebin utawi mapitulung ring sang kelayuan.
 - 5). pacang ngupasaksi warga sane ngrangkat.
 - 6). Pacang wali utawi ngaturang wali manut pangastawan Ida Sulinggih lan Pamangku.
 - 7). Tatkala kapancabaya.
5. Tabuh tetepakan kulkul ring Desa Adat Penasan saha cihnan ipun:
 - 1). Tengeran lumrah:

- a. Tengeran tedun ngayah ring pura, makarya ring banjar, pacang parum, ngrentebin ring sang kalayonan, ngebekin (kalih palet / kalih tuludan sedeng).
- b. Cihna warga ngrangkat / ngrorod (kalih palet / kalih tuludan sada gancang), kukul kaswarayang inganan sampun wengi olih I Klian Banjar.

2). Tengeran baya:

- a. Jiwa baya, upami kaamuk, kabaak, kaculik, kaplagandang, kamalingan, yuda miwah sane lianan (apalet / atuludan ping 4).
- b. Baya siosan upami, puwun, kablabar, anyud linus miwah sane lianan. (kukul kaswarayang saterusnya).
- c. Yan kawentenan baya inucap sampun maren utawi degdeg tur aman cihnan ngrarianang pitulung / parombayan krama (kukul kaswarayang apalet / atuludan tur lamban). Krama sami mapupul malih ring banjar utawi genah siosan manut wiguna, pacang nyacak utawi makerab.

3. Tengeran wali ring pura:

Satunggil wali ring pura, ngawit pangastawan Jro mangku utawi Ida Sang Sulinggih rawuh sapuputing pangastawane, kukul ring banjar kaswarayang negteg utawi nyangsih / masangsihan manut kuweh kulkule.

PAWOS 25

1. Kukul Banjar patut kaswarayang utawi katepak olih prajuru utawi sang kapituduh antuk I Prajuru manut tetujon.
2. Yen sane sinalih tunggil Krama keni kapancabaya, wang inucap utawi krama siosan sapituduhniya kayogya digelis nywarayang utawi nepak sinalih tunggil kukul Banjar Penasan, tur patut supeksa makajalaran buat tetujon panepake.
3. Yan tan wenten sadu ring banjar maka jalaran panepake, sang nepak patut keni pamidanda.

INDIK DRUWEN DESA

PAWOS 26

1. Sane kaanggeh druwen Desa Adat Penasan, kadi ring sor:
Kahyangan Desa upami:
 - 1). Pura Dalem.
 - 2). Pura puseh.
 - 3). Pura Bale Agung
2. Setra wenten kalih (2) palemahan sane kekuwubin antuk tigang banjar luwire:
 - 1). Banjar Penasan Gede.
 - 2). Banjar Penasan Sangging.
 - 3). Banjar Penasan Mungguna
3. Saluwir tanah banjar lan bukti / palaba pura.
4. Tanah Palinggih Pura saha tlajakanniya.
5. Tanah linggih wewangunan druwen banjar, upami bale banjar.
6. Tanah pekarangan banjar, karang embang saha telajakannya.
7. Margi sajeroning wawidangan Desa Adat Penasan.
8. Piranti-piranti druwen banjar luwire:
 - 1). Wewangunan Kahyangan Desa, sakaluwir kang kadrue ring Kahyangan inucap.
 - 2). Bale banjar saha sakaluwirnya.
 - 3). Bale kulkul.
9. Pelangan sakadi tetabuhan lan ilen-ilen luwire:
 - 1). Ilen-ilen wali ring Pura.
 - 2). Gong
10. Pratima - pratima.

PAWOS 27

1. Sahanan sane kadrué antuk banjar patut karaksa, kapiara kapahayu antuk krama Banjar maka sami, maka ping ajeng olih para prajuru banjar.
2. Prajuru banjar wenang ngetangang druwen banjar midabdabin ungguhanniya, wawidanganniya, sapecaranniya, kagunanniya / wigunanniya, utawi yening wenten drue sane patut kaanggen tatkala mrabeanin wewangunan banjar / pura utawi kaanggen pangaci / yajnya ring banjar.
3. Sahanan druwen banjar kaungguhang ring ilekita sane pasti antuk Prajuru saha saparindikan pamargi / panelasnya.
4. Nyabran paruman banjar, druwen banjar patut kasyarang / kacerahang antuk Prajuru manut sane wenten ring ilekita.
5. Krama banjar wenang nitenin tur mastikayang drue sami manut ilekita punika.
6. Prade wenten druwen Jagat / Desa / Pura lan banjar sane ical sang sapesira sane mamandung / mamaling wenang keni danda saha ngwaliang barang inucap.
 - 1). Yening wenten prade tan ngangken ngambil, druwen Jagat / Desa / Pura lan banjar, punika patut keni Padewa Saksi.
 - 2). Prade wenten krama nenten rawuh sajawaning alangan patut matur uninga ring prajuru sowang-sowang.
 - 3). Prade wenten sinalih tunggil krama banjar sane ngambil / mamandung sane suci patut keni pamidanda lan pamerascita.

PALET 6

SUKERTA PAMITEGEP

KAPING 1

KARANG TEGAL LAN CARIK

PAWOS 28

1. Tanah pakarangan Desa / Banjar patut kaayahang olih sowang-sowang krama banjar / Desa, mungguing tlajakanniya kakuasa antuk Desa / banjar.
2. Gegaleng kulon, kangin utawi kaja: Karang, tegal mwang Kaler patut kakaryanin olih sang nrebeang wates punika patut taler kapiara antuk sang nrebeang karang ring ulun ipun.

3. Yan wenten wates karasayang nglikadin utawi runka, patut katepasin antuk prajuru yan pada arsa kangkat ngangge patok / pal saking pemerintah (agraria).
4. Prade wenten karang utawi tegal, carik sane kabebeng, patut kausahayang pamesu utawi rurung.

PAWOS 29

1. Sinalih tunggil Krama Banjar tan kalugra ngalahhah pahan tanah pakarangan, tegal, carik padrebenan anak siosan, punapi malih sane kadrue antuk banjar utawi sane mabuat suci minakadi linggih Kahyangan, Setra, Margi miwah sane siosan.
2. Yan wenten krama malaksana kadi ring ajeng wenang katiwakin pamidanda luwire:
 - 1). Ngwaliang tanah sane kakalahang.
 - 2). Pamidanda panguak swara ring banjar.
 - 3). Yan sane kalahlah marupa genah sane suci krama inucap keni pamidanda pangupakara.
3. Nanggap lan matimbang karang ayahan banjar, makadi ring sor:
 - 1). Sahanan karang banjar sane sampun katanggap tur kaayahang antuk krama banjar patut kagenahin antuk sang ngayahang.
 - 2). Sahanan krama yaning polih nanggap karang, krama inucap patut magenah netep ring karang inucap, mawaneng enem sasih saking ngawit nanggap karang mangda sampun magenah netep ring karang inucap.
 - 3). Yen wenten karang tan wenten ngenahin, tan wenten nanggap tur tan wenten ngayahang patut kadrue antuk banjar.
 - 4). Yan wenten krama pacang usan ngayahang karang patut ngwaliang ring prajuru banjar, I Prajuru manut parareman prajuru wenang matimbang ring krama siosan.
 - 5). Krama ngarep yening pacang matimbang karang, patut polih kabebasan antuk warisniya tur polih pamutus saking prajuru banjar.
 - 6). Krama banjar tan patut ngadol karang ayahan banjar tur nyandayang (ngade)

- 7). Yan wenten krama, maweh krama pangele utawi penyade magenah ring karang ayahanniya sangkan pada rena kalugra satmaka ring sametonanniya, pamergi krama inucap tetep tan maweweh.
- 8). Krama sanunggal tan kayogya ngayahang karang banjar lintangan ring asiki.
- 9). Yan wenten krama banjar ngarep polih karang warisan, patut kaayahang ring krama inucap.

KAPING 2

PEPAYONAN

PAWOS 30

1. Matetanduran kekayonan, tanem tuwuh sane ageng, yogya adepa agung saking wates karang mangda tan ngrebrehin / mayanin ring tiyosan.
2. Prade wenten tetanduran tanem tuwuh sane ngarebrehin utawi kaanggeh pacang mayanin kapisaga wenang kawara, madasar paiguman sane becik mangda kekayonan punika di gelis karebah utawi katebtebin.
3. Yan wus kawara / kawatra kadi ucaping ajeng sang nrebeyang tan satinut utawi tan wenten usaha nagingin pinmas sane ngwara, sang rumasa karebrehan tur ajerih pacang kabayanin patut nyadokang ring Prajuru banjar.
4. Prajuru wenang maritiaksa maweh panycepat pamutus arep ring sang nrebeyang kekayonan inucap mangda digelis karebah kekayonan sane kawara.
Sang mundung utawi ngwara patut nawur pancbas urip utawi pangorok urip kekayonan inucap, mageng apah dasa saking pangargan taru inucap.

KAPING 4

INDIK WEWALUNGAN

1. Sahanan warga Banjar Penasan kang mamisara wewalungan, patut sayaga nitenin wewalunganniya upami: negul, nglogor mangda tan ngrusakin karang utawi pabianan krama tiosan bilih-bilih nyantos ngletehin Kahyangan.

2. Prade wenten wewalungan malumbar utawi galak jantos ngrusakin pakarangan / pabianan risampune kaplungguhang / polih kawara, kengin kataban tur kasadokang ring Prajuru, I Prajuru wenang mamidanda sang nrebenang manut pararem tur kapatut keni karugian naur panebas asing-asing sane karusakang.
3. Prade ngletehin genah suci, risampune kaparitatas olih Prajuru sang nrebenang patut keni pamidanda, tur saha ngupakara Kahyangan inucap manut purana.
4. Tan kawenang ngangonang utawi negulang ring genah-genah kadi ring sor:
 - 1). Tlajakan pakarangan Desa.
 - 2). Margi-margi agung ring Desa.
 - 3). Setra, Alun-alun.
 - 4). Genah-genah rawuhing pakarangan wewangunan banjar.

KAPING 5

INDIK BAYA LAN DUSTA

PAWOS 31

1. Sahanan palaksana sane tan rahayu sane mawesana ngawinang pakobet, duhkita, duskreta ring wang utawi krama banjar, sinanggeh baya, wang utawi sang sane ngawinang baya sinanggeh dusta.
2. Sane kasinanggeh baya utawi panca baya upamin ipun:
 - 1). Jiwa baya: kaamuk, kabaak, kaplegandang, kaculik.
 - 2). Arta baya: kamalingan.
 - 3). Geni baya: puun, linus, blabar, anyud lan salantur ipun.
 - 4). Kaplagandang, kabegal, kapaksa.
 - 5). Duracara ring agama.

PAWOS 32

1. Sahanan warga desa sane katiban baya yogya digelis atur supeksa ring I Prajuru utawi sang wenang mamawosin.

2. Sahanan warga banjar sane uning ring wenten jedma malaksana dusta mayanin patut digelis atur supeksa ring prajuru.
3. Yan prade katiban baya ageng upami: Jiwa baya, Arta baya, geni baya, kaplegandang, sang katiban baya utawi sang amangguh baya inucap wenang digelis nywarayang kulkul tur atur supeksa ring prajuru, utawi kengin nunas pitulung ring pemerintah Agung makadi: Polisi, Hansip / lan Pemadam Kebakaran.
4. Sahanan warga banjar patut sayaga mapitulung ngromba saha gegawan manut kawentenan baya punika. Tur patut ngromba sang keni baya manut duhkitannyane, sih dana miwah siosan mangda sang duhkitan prasida polih katulungan.

PAWOS 33

1. Yan prade pacang maseserep utawi ngledahin ritakala kamalingan / Arta baya, patut nunas panguak dumun ring prajuru, Klian utawi Prebekel.
2. Maseserep, tios bebanjaran utawi Desa patut polih panguak ring prajuru utawi Klian banjar inucap.
3. I Prajuru patut nuntun mangda tingkah-tingkah maseserep manut ring awig-awig.

PAWOS 34

1. Sahanan wang malaksana dusta sang ngawinang baya patut keni pamidanda ring banjar, katiba jampi ring sang kabayanin nyangaskara manut kawentenan baya inucap, tur katur ring Pemerintah Agung.
2. Yan prade mayanin ngrusak utawi ngamaling drue sane kasinanggeh suci, patut pamidanda punika mawewehin panyangaskara Caru utawi prayascita.
3. Sang malaksana Dura cara ring agama, prade kacihna manut tripremana, wang inucap keni pamidanda panegteg aksara.
4. Yan dusta saking dura Desa, yan kaejuk patut kataban, raris kaaturang ring Pemerintah.
5. Yan wenten warga banjar malaksana duskerti, saluwir asta cepala, wakcepala ring warga banjar siosan patut keni pamidanda: yan marep ring sang kapingsinggihang / singgihang manut susila lan agama, wang inucap patut keni pamidanda pamrascita marep ring sang dinuskerti.

6. Yan ana wang nguman-nguman, wakparusia, wakcepala, kroda mayuda ring sangkepan, ring pura, wang inucap patut keni pamidanda.

KAPING 6

PANGUNYAHAN BANJAR

PAWOS 35

1. I Krama Banjar ritatkala ngawentenang karya suka duka patut polih pangunyahan banjar (karomba) antuk krama banjar ring sowang-sowang banjaran kadi mungguh ring sor:
 - 1). Rikala yajnya manut pinunas sang mayajnya.
 - 2). Rikala ngwangun pitra yajnya, manusa yajnya, manut pinunas sang mayajnya.
 - 3). Banjar rikala mapitulung ring sang kaduhkitan / utawi ngwangun pitra yajnya pasajine sasidan-sidan.
 - 4). Palaksanaan pangrombaan sangkaning pinunas sang mayajnya, mawates tigang rahina nyantos puput yajnyane.
2. Prade wenten pakaryan banjar, I Prajuru banjar tiyosan ngamargiang pangunyahan manut dresta, upami sane madruc lelanguan ngaturang tetangguran saantukan rumasa panukun banjar maka tangan sukuning banjar.

SARGA 4

KASUKERTAN TATA CARA AGAMA

PALET 1

INDIK KAHYANGAN DESA

PAWOS 36

1. Luwir pura-pura sane wenten ring Desa Adat Penasan:
 - 1). Pura kahyangan Desa, Pura Puseh, Pura Bale Agung, Pura Dalem Kelod, Pura Dalem Kaler, Pura Pamuteran.
2. Pujawali ring pura-pura inucap ring ajeng kadi ring sor:
 - 1). Ring Pura Puseh lan Pura Pamuteran: Buda Kliwon Ugu.

- 2). Ring Pura Dalem Kelod: Buda Umanis Medangsia.
 - 3). Ring Pura Puseh (meru), Pura Bale Agung: Sukra Pahing Dunggulan.
 - 4). Ring Pura Dalem Kaler: Anggarkasih Medangsia.
3. Pangemong muang pangemponniya:
- 1). Ring Pura Puseh, Pura Pemuteran, Pura Dalem-Mrajapati, yajnya rawuhing pawangunanniya kaamong / kaempon olih banjar Penasan Mungguna.
 - 2). Ring Pura Dalem Kaler, yajnya rawuhing pawangunanniya kaamong / kaempon olih Banjar Penasan Tengah (Gede).
 - 3). Ring Pura Puseh (Meru) lan Pura Dalem Kelod, yajnya rawuhing pawangunniya kaamong / kaempon olih Banjar Penasan Sangging.
 - 4). Ring Pura Bale Agung pawangunannya kaamong / kaempon olih Banjar Gede ring Banjar Sangging sakewanten yajnyanniya kaamongin olih Banjar Sangging.

PAWOS 37

1. Ring sowang-sowang Pura Desa kawentenang Pamangku Pura Desa, sane yogya pacang ngenterang / nuntun sahanan yajnya utawi pangastawan ring pura inucap.
2. Sane patut kasudi dados pamangku:
 - 1). Mawiwit saking katurunan, oka utawi waris Pamangku sane let.
 - 2). Nunas wara nugraha paswecan Ida Bhatara ring natar Pura.
 - 3). Yan prade pamargi pinunase inucap ring ajeng tan prasida, patut kawentenang pamilihan sesudian saking krama banjar jagat.
3. Nyudi pamangku nglinggihang dados pamangku patut ngeninin geguat sane manut ring ucaping Dharma kapamangkuan tur tan nglempasin kecap sastra lan agama.
4. Sane tan kawenang dados pamangku luwire;
 - 1). Wang cedangga.
 - 2). Amungpang laku.
 - 3). Muang wang sane tan kararemin antuk banjar.
5. Dudonan pacang dados Pamangku luwire:

- 1). Kararemin antuk krama banjar swara gilik sadulur krama banjar.
 - 2). Nunas waranugraha ring pura malarapan sesajen / wewantenan.
 - 3). Mawinten / nyuciang raga kapuputang olih Ida Sang Sulinggih.
6. Sang kasudi dados Pamangku Desa riwus puput pawintenanniya, patut kaping singgih manut wigunanniya tur kamarginin saulah pamargi Pamangku Desa manut pamonganniya.

PAWOS 38

Swadarmaning Pamangku:

1. Aswaka Dharma astiti bhakti ring Ida Bhatara sesuhunan utamanniya ring Ida Sang Hyang Widhi.
2. Ngenterang, ngastawang sahanan upakara / upacara ritatkala patirtan utawi yajnya siosan ring pura.
3. Ngastawayang / ngokasang tatkala wenten krama pacang ngaturang puniya punagi, mapanauran utawi nunas panedunan ring pura.
4. Nglaksanayang sahanan mabuat suci ring Pura Keluarga, nedunang utawi nglinggihang Ida Bhatara utawi Pralingga.
5. Ngaturang aturan ngangken rerainan Purnama lan Tilem.
6. Nuntun krama siosan mangda setata bhakti ring Widhi tur malaksana susila manut agama.*
7. Pamangku-pamangku Desa yogya nyiratin tirta ring Krama sane siosan, sakewanten yan ring krama sane kasinggihang, patut sangkaning kalugra antuk sang kasiratin.
8. Pamangku-pamangku paibon, Dadya, kawenanganniya wantah ring krama dadyanniya inucap, kewanten duwaning pamangku paibon lan dadya, kasudi tur kaanggen, kaupakara rawuhing wesananniya antuk krama dadianniya inucap.

PAWOS 39

1. Ritatkala ngenter yajnya utawi patirtan ring pura, pamangku Pura ring Desa inucap patut:
 - 1). Pinaka pangenter pangarep ring pura.
 - 2). Yogya polih pangromba ring pamangku-pamangku siosan.

- 3). Yogya niwakang pituduh ring mangku sanak / mangku siosan lan marep ring krama desa siosan.
2. Yan prade Jro Mangku sane marep keni kapialang jantos tan prasida ngamargiang upakara ring pura, patut upacaraane kamargiang ring pamangku Desa sane siosan utawi yogya nuur Ida Sang Sulinggih.
3. Yan ana Pamangku keni ujar ala, ulah ala, Pamangku inucap patut kaprayascita, kasepuh olih krama desa, sang maweh ujar ala, lan ulah ala, kakeninin pamidanda manut pararem.
4. Yan prade ana Pamangku kabuktiang amungpang laku nyasar ring sesana, Pamangku inucap tan kawenang kasepuh tur tan syah munas pamatut ring sang Sulinggih utawi sang patut mawosin.

PAWOS 40

1. Sahananing aturan-aturan / sesangi, aturan sesari, aturan arta, leluwes, mule-mule miwah sakaluwire patut kadruc ring pura inucap.
2. Sahanan wang sane pacang maturan, mapanauran kadi ucap ring ajeng patut masadok ring pura inucap, wus kaastawayang antuk Jro Mangku, aturan inucap patut kaungguhang ring ilekita.
3. Sahanannya kadi ucap ring ajeng wenang kaangge ring pura manut tetujon.

PAWOS 41

Petitis utawi ulih-ulihan Pamangku luwire:

1. Kaping singgih krama manut linggih tur sesanannya.
2. Polih pah-pahan sesari manut pararem.
3. Polih petias siosan saking aturan Krama manut pararem.
4. Polih pahan pamupu saking bukti / palaba pura manut pararem.
5. Leluputan peson-peson ayah muwang padagingan manut pararem.
6. Kaupakara antuk Krama Banjar indik Pawintenannya, Pamrascitannya / panyepuhannya.
7. Kaupakara pitrayajnyannya riwekas antuk banjar tur pamargi pitra yajnyan ne kalaksanayang ring patus sane ngawidangin.

PAWOS 42

Ngentosin Pamangku luwire:

1. Ngentosin Pamangku ngawit saking sangkaning ring sor:
 - 1). Kelayuan / Jro Mangku seda.
 - 2). Pinunas saking Jro Mangku inucap.
 - 3). Jro Mangku kausanang malarapan sangkaning kanorayang / malaksana dusta.
2. Prade Pamangku kausanang malarapan sangkaning kanorayang utawi malarapan saking malaksana asta dusta Pamangku inucap patut kené pamindana ngewaliang pewitenannya pecak manut pararem.
3. Prade Jro Mangku malih ngalap rabi sangkaning rahayu; utawi tan sangkaning dusta / pemaksan patut I Pamangku nyapuhin raga tur katodia antuk I Prajuru banjar.

PAWOS 43

Kasukertan Kahyangan kadi ring sor:

1. Sahanan krama banjar lan warga banjar sami patut nureksa nyaga mangda kasukertan kalih kasucian Kahyangan Desane tan kaletihin.
2. Sane tan kalugra ngranjing kasejeroning pura:
 - 1). Sang sebel ring raga: raja sewala, durung tugtug akambuhan.
 - 2). Cuntaka mawit sangkaning kalampusan manut sengker.
 - 3). Jatma sane kapianggeh patita: panak bebinjat, beling tan wenten ngangkenin tan kasinangaskara, jatma buduh, sakit ila muang sakancan cendala siosan sadurung polih kaprayascita manut agama.
 - 4). Sato ageng sajawaning mapepada.
 - 5). Mabusana sane tan patut manut tata susila ngranjing ring pura.
 - 6). Sadurung polih uwak-uwakan / lelugrahan saking prajuru.
 - 7). Makta barang sane kasinanggeh letuh manut agama, saluwiring barang mawit saking watangan, layuban pitra yajnya.
 - 8). Sahanan sane tan kapatutang manut pararem, cendala siosan utawi sane kabaos ngletihin.

3. Pratingkah laksana sane tan kawenang ring Pura:
 - 1). Masumpah / nahap cor, sajawaning sangkan pituduh utawi kauwakang olih prajuru.
 - 2). Maujar ala, ulah ala, wakparusya, nemah / misuh.
 - 3). Majajal mayuadi, punapi malih jantos metu rah, kabaos ngletehin.
 - 4). Menehang wastra, menehang pusungan muah sane siosan.
 - 5). Makoratan / makobetan, anguyuh, makolem lanang-istri masarengan dados asiki, masenengan, matemu rasa, masanggama muah sane siosan.
4. Yan kabuktiang wenten jadma utawi krama sane malaksana sane kabaos ngletehin kadi ucap ring ajeng keni pamidanda manut pararem. Yan prade kabaos banget ngletehin makadi mayuadi metu rah, masanggama, makta sahanan barang leteh, kahyangan inucap patut kaprayascita. Sang malaksana keni pamidanda harta lan pamrascita.
5. Yan Kahyangan Desane keni kadurmangalan sakadi kapanca bayan, karubuhan, kahanan kawangke-wangke sato ageng, I Pamangku patut laksana digelis nyadokang ring Prajuru mangda marumang krama desa pacang ngwentenang pangupakara sapuputnya.
6. Prade wenten jadma utawi krama desa karawuhan ring pura, patut digelis kapintonin antuk kaweruhan manut ring kecap sastra lan agama (Widhi Tatwa), maka jalaran muktiang jati tan jatinniya wang karawuhan inucap, yan tan jati karawuhan patut keni pamidanda manut pararem.
7. Yan wenten wang / wong edan jantos ngrusak palinggih utawi siosan ring pura, wang inucap utawi kapatutanniya patut mecikang sahanan sane rusak tur keni pamrascita manut agama.

PALET 2

INDIK RESI YAJNYA

PAWOS 44

1. Sang pacang mapudgala / madwijati sadurungniya patut:
 - 1). Polih panugrahan saking Parisada Hindu Dharma lan Kantor Agama makacihna sang pacang mapudgala inucap sampun putus katitenin, katureksa indik sahanan kawentenan / pangweruh muang pawonganniya tan nglempasin kadi kecap ring sastra dresta, sulakseminniya, kaweruhanniya manut dharma lan sesana sane pacang kemargiang.

- 2). Taler patut wenten sadu ring I Prajuru Desa.
2. Prajuru Desa patut nitenin / nureksa mungguhing kawentenan anggalan laksana sang pacang mapudgala mangda jati-jati tan lempas utawi jati manut ring kecaping agama.
3. Yan prade nglempasin utawi nyasar tan manut sakadi kecaping agama, I Prajuru wenang tan ngraremin.
4. Risampun patut upakarane tur nabèn Ida sampun mapaica parab, I Prajuru patut nyiarang indik parab lan pamargin Ida Sang Wus Putus Madwi Jati.
5. Padiksan / pawintenan pamangku Desa utawi pamangku siosan kamargiang manut sakadi kecap ring ajeng.
6. Sang mawinten sane pacang mamargi: nyonteng, Dalang, ngusadain sakaluwire sane pacang ngenterang yajnya manut tetujonniya, patut masadok ring I Prajuru. I Prajuru wenang ngawas nitenin, kawentenanniya tur nyaksinin upakaranniya. Salanturniya I Prajuru nyarwakang indik tetujon pamargin sang mawinten inucap rawuhing wates wawidanganniya.
7. Prade nyasar tan manut kecap agama lan tetujon I Prajuru wenang ngandeg pawintenanniya.
8. Ida Sang Sulinggih sane kaadegang pinaka Siwa (pinaka Guru Loka / Palasraya) antuk Desa kapatut kadi ring sor:
 - a. Upakara / upacara padiksan Ida lan yajnya patiwani Ida riwekas kelaksanayang antuk Desa.
 - b. Pinaka panuntun I Krama Desa ring Indik Tatwa, Etika, Upacara Agama.
 - c. Muput yajnya lan upacara ring kahyangan utawi yajnya lan upakara krama Desa.
 - d. Pinaka kerta desa patut matetiwak pamutus lan pangaskara, pamrascita marep sing sang duskerti, manut putusing kerta desa.
 - e. Krama desa ring singgih linggih Ida tur patut ngaturang pangresibojana utawi punia.
 - f. Tan kapatut muput yajnyane sane kantun sajroning wicara.

PAWOS 45

1. Prajuru yogya nuntun Krama desa mingsinggihang utawi mikukuhang linggih sang para Wiku, para Pamangku, lan sang sujana sami manut linggihnyane.

2. Krama Desa patut ngaturang punia, tatkala wus ngaturang karya pemuput yajnya.
3. Krama patut piteleb pisereng nunas pangayah sang pandita utawi para sujana sane mawesana kasutreptian karahayuan desa manut aji agama.
4. I Krama Desa siosan Ida Sang Sulinggih patut ngaturang punia tur muputang yajnya patetiwan Ida riwekas.

PAWOS 46

1. I krama desa katuntun olih I Prajuru wenang nitenin seolah pamargin sang muput yajnya siosan.
 - a. Mangda sahanan yajnya sane kawentenang madudonan manut kecaping aji.
 - b. Mangda tan nyasar laku, tan manut ring swadarman kalih sesanannya.
2. Yan prade wenten sane tan manut, punapi malih kabuktiang nyasar laku madasar tripremana (bukti, saksi, ilekita). Sang Pandita utawi Pamangku patut katunasin pamutus ring nabenniya utawi ring sang sane patut maweh panepas mangda kaicen pamutus.
3. Tetiwak sang nabe sane sampun kasanggra / kakukuhang, antuk sang mawangrat (Pemerintah) utawi jawatan agama sinanggeh pamutus sane pastika.

PALET 3

INDIK PITRA YAJNYA

PAWOS 47

1. Sahanan upakara pamreteka sang huwus lampus kabaos pitra yajnya sakadi:

Mersihin sawa, mendem, ngeseng sawa, atiwa-tiwa. Wus punika kalanturang antuk upakara pangroras, ngangkid utawi nuur rauhing nglinggihang ring parhyangan Dewa Hyang Bhatara. Duluran upakarannya nganutin kecap yama tatwa kalih purana, kadulurin tirta pangentas saking paican Ida Sang Sulinggih.
2. Mendem sawa, ngeseng utawi mendem sawa:

- 1). Yan sang lampus wus pupak / ketus untu patut nganutin padewasan pangutangan sawa makadi kecaping wariga manut dresta. Saha nunas palugrahan ring sang sulinggih. Yan rare / anak alit durung pupak, kalugra mendem premangke, tan ngantos dewasa.
 - 2). Genah mendem ring setra ugi (setra bajang).
 - 3). Ida Sang Sulinggih wenang molih linggih atiwa-tiwa manut dresta.
1. Pamargi padewasan mendem utawi atiwa-tiwa, taler kapidabdab nganutin paetangan desa, kala, patra, upami yan katuju wenten yajnya ring jagate utawi ring desa, upami Kahyangan Agung, karya ring Pura.
 2. Yen prade sang kabukti kalampusan kawentenannya kobet, (dahat kamewehan) kalugraha makingsan sawa ring setra premangke. Pamarginnyane mendem mangda inganan sampun sore, tan nywarayang kulkul, tan paupakara, sasiliban / mangda silib tur tan nganggen gegumuk. Pamrateka pangupakara sang lampus inucap kalaksanayang ring panemaya padewasan pamendemannya manut panugrahan Sang Sulinggih.
 3. Yan prade wenten krama kalampusan rikala wenten wali ring paibon, dadia, pamargine mendem mangda sampun puput sang madrue paibon utawi dadia ngaturang puja wali.
 4. Rikala wenten krama desa lampus katuju rahina Purnama / Tilem tan kalugra mendem sawa.

PAWOS 48

1. Prade lampus sangkaning salah pati, ulah pati, kabengawan utawi siosan sakaluwirmiya kengin kabakta budal, pratekannya wantah abersihan tur kasanggra antuk banten pangulapan, banten panebusan, wus punika patut kakingsanang premangke. Riwus matuwuh asasih pitung rahina wenang kapreteka kadi patut banten pamendem.
2. Yan wenten wong istri lampus ngadut manik tan wenang kapendem sadurung bobotannya embas.
3. Yan wenten krama madrue warga kena gering agung / sakit ila, wenang / kengin kasadokang, tur sang rumaksa patut matiba jampiang antuk usaha mangda sang kageringan mawali waras.
4. Yan wenten krama ngarep sane keni gering inucap patut taler katiba jampiang antuk usaha mangda gering / sang kageringan mawali waras. Yan tan asapunika

nenten kaajak makrama, sajawaning sampun polih surat keterangan saking Pemerintah (Dinas Kesehatan). Yan tan asapunika rikepatianniya, wang agering inucap tan polih parombayan krama.

5. Prade wenten padem ring carik, tegalan, sang madrebeyan kapatutan utawi waris patute keni pamrascita lan pacaruan saalitniya amancawarna, tur kalaksanayang ring genah inucap, mawaneng sadurung asasih pitung rahina.
6. Prade wenten wong padem ring pekarangan, tegal, tepi siring wewidangan desa Penasan tan keni elingan, sesampune kapituduh antuk Pemerintah wong padem punika wenang kapendem ring setra, kalaksanayang antuk desa sane ngwidangin. Upakara pamrascita / paletahan desane kamargiang desa.
7. Yan wenten krama utawi siosan ngelingang utawi ngangkenin, wang inucap patut keni pangupakara paletihin inucap.
8. Prade wenten krama saking tiyos Desa pacang mendem, utawi pacang matempung ngaben ring desa Penasan, patut keni pananjung batu, panukun setra miwah pakenan siosan manut pararem, muang tan polih panyangran desa / banjar.

PAWOS 49

Parombayan krama tatkala kalayuan, makadi ring sor:

1. Prade sañe kaduhkitan / kapademan:
 - 1). Krama sane kepademan patut digelis nyadokang ring I Klian Banjar, aptine nunas tetimbangan ring prajuru indik tetujon pamargine manut kawentenannyane.
 - 2). Nunas parombayan krama banjar / desa manut pamarginnyane tur polih sumbangan kasa 6 (enam) meter saking krama banjar / desa.
 - 3). Ngaturin krama banjar / desa panyembrama sakawentenanniya.
2. Prajuru patut:
 - 1). Maritetes tetujon pamargin sang kaduhkitan manut kawentenanniya.
 - 2). Nywarayang kulkul manut dudonanniya.
3. Krama pangromba patut:
 - a. Nedunin patus sane sakadi kararemin manut pamarginnyane.

- b. Krama kalih warga ngromba sang kaduhkitan sapatutnya manut pamargin dresta.
 - c. Ngamargiang patus manut pidabdab pamargin patus sane sampun kaanutin ring pararem.
4. Rikala ngamargiang / nyandang sawa utawi nyandang wadah sakaluwirnya, saha upakarannya, pamargine ka setra mangda dabdab antar tan ulah laku. Mangda dabdab ateh atehan upakarane, pamereman sawa, wadah, patulangan, lan sakaluwiripun tan kengin karusak, sahanan pamargin upakara mawesana rahayu.

PAWOS 50

Yan kalaning wenten patirtan / pangusabayan ring Pura Desa sadurunge Ida Bhatara patut katuran wali / patirtan tan kalugra mendem, asapunika taler tatkala pacang nyineb, sadurunge Ida Bhatara wus masineb tan kalugra mendem.

PAWOS 51

Mungguing kacuntakan makadi ring sor:

1. Sang kacuntakan tan kengin rawuh / ngranjing kagenah utawi palinggih sane kapianggeh suci, punapi malih ring Pura-pura Desa.
2. Luwifé sang kahanan cuntaka:
 - 1). Raja swala.
 - 2). Wit maduwe / ngembas putra.
 - 3). Karuron.
 - 4). Kapademan.
 - 5). Nyambut karya Pitra Yajnya, ngawit saking ngulapin.
 - 6). Miwah cuntaka sane siosan manut pamargi.
3. Lamin sengker cuntakane manut kawentenan jalarannya sakadi ring sor:
 - 1). Raja swala, 3 (tigang) rahina ngawit saking ngraja swala.
 - 2). Ngembasang putra, 42 (petang dasa kalih) rahina ngawit saking putrane embas kantos sampun kaupakara makambuhan.
 - 3). Karuron, 42 (petang dasa kalih) rahina ngawit saking karuron.

- 4). Kapademan, cuntakanniya ngawit saking kapademan:
 1. Sebel bebanjaran, jantos 3 (tigang) rahina wusnya mendem / pangutangan.
 2. Sesebelan kapademan kaluarganniya sane sajeroning pekarangan jantos 11 (solas) rahina.
 3. Yan kapadem yayah-rena, katekang anak sios pekarangan jantos 3 (tigang) rahinannia jantos 42 (petang dasa kalih) rahina.
 - 5). Yan anak alit sampun kepus pungsed sadurung maketus, sesebelan reramannya jantos 27 (pit likur) rahina.
 - 6). Sang sedeng nyambut karya / yajnya (pitra yajnya cuntakanniya ngawit saking ngulapin 7 (pitung) rahina riwus yajnyanniya.
 - 7). Yan ritakala sedeng nyambut karya / yajnya ring Pura Desa, sane polih pialang sebel wantah sang ngarepin, kalih pangapitnya kemawon.
4. Sane tan keneng cuntaka / sesebelan:
- 1). Ida Sang Sulinggih / Ida Pedanda.
 - 2). Para Pamangku Desa.

PAWOS 52

1. a. Sane patut kaabenang: Sahanan sawan sang sane sampun mayusa apupak (maketus untu) tur sahanan sawa sane tan kabaos letuh wenang kaabenang.
- b. Sang sadurung kapupak kapatut nglungah.
- c. Sawan sang kabaos letuh wenang kaabenang riwus puput sengkernya tur kaprayascita manut agama.
2. Sinalih tunggil krama yan pacang atiwa-tiwa patut ngamargiang patus.
3. Tingkahe ngangge patus, wenang ngangge patus bebanjaran.
4. Tatkala mamargi petiwan masa, patus banjar ngamargiang pakaryanniya ring sowang-sowang bebanjaran manut pamargin patus.

PAWOS 53

1. Yan kalaning patetiwan masa padgatakala pamargine kadi ring sor:
 - 1). Ngabas: ngaryanin margi ka setra.
 - 2). Ngaryanin rerompok.
 - 3). Ngaryanin pasanggrahan.
 - 4). Nangiang / ngebet sawa / tulang.
 - 5). Ngaryanin lan makta tatakan api.
 - 6). Nyandang wadah lan eteh-ete upakara tiyosan, jantos nganyud.
 - 7). Sajawaning inucap ring ajeng, manut paiguman, lan pangenter prajuru.
 - 8). Nganyud.
2. Tataning pamargi utawi nyandang wadah utawi tiyosan, mangda manut tetujon upakara yajnya tur mawesana rahayu.

PAWOS 54

1. Yan wenten krama sane ngabenang sawa, saking tiyos desa, utawi matempung saking desa tiyosan, krama inucap patut sadurungniya nyadokang ring prajuru, tur nawur pakenan-kenan sakadi ring sor:
 - 1). Panukun setra.
 - 2). Pananjung batu.
 - 3). Pangungkab lawang.
2. Sahanan / saluwiring aturan ring pura Dalem mawit saking Panukun Setra, Pananjung Batu, Pangungkab lawang, Panebus atma, manggeh druwen desa tur kamanggehang ring ilekita.
3. Prajuru-prajuru miwah pamangku ring Pura Dalem patut polih pah-pahan saking aturan inucap manut pararem.

PALET 4

INDIK MANUSA YAJNYA

PAWOS 55

1. Manusa Yajnya inggih punika, upacara / upakara darmaning manusa ngawit saking patemoning kama bang lawan kama petak sajeroning garba wesaning ibu jantos lampus riwekas.

2. Upakara / upacara kadi ring ajeng luwire:
 - 1). Magedong-gedongan.
 - 2). Tatkala rarene wawu embas.
 - 3). Kepus pungsed udel / malepas awon.
 - 4). Tugtug akambuhan (petang dasa kalih rahina)
 - 5). Rare mayusa tigang sasih.
 - 6). Rare mayusa 6 (enem) sasih aweton.
 - 7). Makepit rambut.
 - 8). Tugtug kelih.
 - 9). Mapandes.
 - 10). Mawiwaha
 - 11). Mawinten / madwijati.
3. Upacara-upacara inucap ring ajeng nganutin kecap agama nista madya utama nganutin dresta muang simacara ring Desa Penasan.

PALET 5

INDIK BUTA YAJNYA

PAWOS 56

1. Bhuta Yajnya inggih punika sahanan upacara / upakara pabyakala ring pratiwi lan kahyangan muang sarwa Bhuta Kala.
2. Upacara-upacara Pabyakalan ring sarwa prani, luwire:
 - 1). Sarwa tumuwuh, ring Tumpek Wariga.
 - 2). Sarwa prani / ingon-ingon ring Tumpek Uye.
3. Upacara / upakara pabyakalan ring pretiwi miwah Kahyangan lan sarwa Bhuta kabaos macaru luwiripun: Eka Sato, Manca Sato, Manca Sanak, Pamalik Sumpah, Tawur Kasanga, Yajnya Sesa, ngejot kalaning wus ngratengang.
4. Sajawaning munggah ring ajeng, malih pabyakalan marep ring manusa manut wiguna.
5. Malih tatkala Tilem Kasanga kawentenang tawur kasanga tur nglungayang Ida Bhatara ring Kahyangan Tiga ka segara.

1. Upacara tawur kasanga / ritakala Tilem Kasanga, patut kalaksanayang kadi ring sor:
 - 1). Ring prempatan agung desa Penasan kawentenang pacaruan jagat, agung alit pangambile nganutin desa kala patra sanistane (sata berumbun). Tur ngaturin Bhatara ka perempatan agung (masolah). Ring sasih Karo taler kawentenang pacaruan ring prepatan agung, agung alit pangambile manca sata.
 - 2). Ring prempatan, patigaan siosan utawi ring desa kaamongin antuk banjar manut pah-pahan amongan.
 - 3). Ring pura-pura Desa olih I Prajuru Desa, Pamangku.
 - 4). Ring Pura Dadiya, sanggah / pamrajan paumahan kalaksanayang antuk sowang-sowang pangempon.
2. Nyoreang kawentenang pangrupukan mabuwu-buwu. Pangrupukan kapidabdab antuk I Prajuru mangda tan jantos ngawinayang karusakan, utawi baya tur mangda tan langkungan ring atengah wengi.
3. Ring rahina panyepiane patut kamargiang brata panyepian / catur brata manut agama, luwire:
 - 1). Amati geni.
 - 2). Amati karya.
 - 3). Amati lelungayan.
 - 4). Amati lelanguan.
4. Pamargin bratane manut kawentenan Desa, Kala, Patra, saha katuntun olih Prajuru Desa utawi sang sane kasudi. Pangawit lan waneng ngamargiang brata patut macihna swaran kulkul manut pararem.
5. Sang sane mamurug brata panyepian punika patut keni pamidanda manut pararem, sajawaning sane polih lelugrahan manut wigunanniya kalih pakobetanniya utawi pialang, antuk prajuru.
6. Ring rahina ngembak geni, mapiteges, panglukaran brata semadi sowang-sowang krama patut nunas pangaksama ring sametonniya, tur ngawit dewasa Isaka warsa.

SARGA V

INDIK PAWIWAHAN

PALET I

PAWOS 58

1. Pawiwahan panunggalan purusa lan predana lanang istri malarapan panunggalan sukacita kadulurin antuk upasaksi sekala lan niskala.
2. Pidabdab pawiwahan ring Desa Penasan dwaning desa nglajerang / ngamanggehang pamargin purusa, waris purusa / karma kapurusa, pawiwahan sane kapatut ring desa inggih punika Sang kapurusa / wang laki sane kapatut ngalap rabi. Sang predana sane pacang kawiwahang patut karabiang / kapaumahang ring sang kapurusa.
3. Pamargin pawiwahan wenten palih-palihan ipun luwire:
 - 1). Pepadikan / kamanggala antuk pakraman.
 - 2). Ngrangkat / ngrorod, mamargi rihin / sesiliban wus punika wawu kakrunayang.
 - 3). Nyeburin sang lanang kapretisentanayang, kamargiang laju kawiwahang ring wadone.
4. Pidabdab sang pacang mawiwaha, luwire:
 - 1). Sang sampun mungguh teruna deha.
 - 2). Sangkaning pada rena / tan kaparikosa.
 - 3). Yen prade ngambil sios agama patut kamanggala antuk banten panyambutan.
 - 4). Nganutin kecaping Agama sejana jenyana.
 - 5). Mangda nganutin daging Undang-Undang Perkawinan sane kalajerang antuk Pemerintah.
5. Yen tan manut sakadi kecaping ring ajeng, tan kasinanggeh syah, tur kapalasang, sang mamurug patut keni pamidanda.

PAWOS 59

1. Pawiwahan sane sampun puput kasahang ring Desa Penasan:
 - 1). Pamargi pawiwahan sampun nganutin pidabdab pawiwahan ring Desa Penasan.
 - 2). Sampun mawidi wedana sanistanniya pabyakalan.
 - 3). Kasaksinin antuk prajuru, Pemerintah.

- 4). Sampun munggah ring ilekita Banjar utawi Dinas siosan.
 - 5). Nawur prebea upasaksi maserana antuk pajati.
2. Sane kabaos tan kapatut utawi kabaos tan syah luwire:
 - 1). Pepaksaan tan pada rena.
 - 2). Durung tutug yusa (durung tutug kelih)
 - 3). Tan paupasaksi.
 - 4). Tan pailekita / pinaka saksi / bukti.
 - 5). Miwah sane tan manut sakadi geguat pamargi pawiwahan sakadi kecap ring agama makadi gamia gamana.

PAWOS 60

TATA CARA PARABIAN RING DESA PENASAN KADI RING SOR:

1. Sang pacang marabian ngwarangang kulewargannyane, patut masadok ring I Prajuru indik pamargin pawarangane.
2. Pamargin pepadikan madudonan sakadi ring sor:
 - 1). Pakeraman ping tiga luwire: Pasewakan, pangambilan, pangunyaan.
 - 2). Yan sampun pada tulus bebawosane tur sami anut, wargan sang wadon raris masadok ring Prajuru utawi Klian Banjar.
 - 3). Pangunyaan maduluran pajati katur kasanggah / pamrajan wadone.
3. Prade ngrangkat / ngrorod, sang sane ngrangkatang / ngambil anak istri patut lumaksana sakadi ring sor:
 - 1). Ngwentenang pasedek sanistanniya kalih diri (siosan ring rama rena kalih sameton). Tan kasepan ring awengi, saha maserana suluh.
 - 2). Ngwentenang panglukuan ping tiga manut tata cara saha duluranniya.
 - 3). Daging panglukuane:
 - a. Nunas pangampura, geng rena manut ring sang wadone.
 - b. Kaigumang antuk bawos idih pangidih saha mapenulus, ngrencana padewasan pabyakalan lan pasakapanniya.
 - 4). Duluran panglukuane, luwire: sedah, jambe, arak lan salantur ipun.

4. Wus pangambilan warga sang istri masadok ring I Prajuru.
 - 1). Prajuru raris nywarayang tetengeran kulkul, makacihna pamargi ngrangkate sampun katrima, laju natab pabyakalan.
5. Yen jantos ping tiga panglukuane durung katrima, sang lanang patut nyadokang pamarginnyane ring Prajuru utawi ring Pemerintah Agunge.

PAWOS 61

1. Sang kaicalan kulawarganniya yogya digelis atur supeksa / masadok ring I Prajuru tur kayogya nunas pamitulung pacang maseserep.
2. I Prajuru patut ngenterang pamargine maseserep tur nuntun seserepe mangda nganutin tata kertin desane.
3. Paseserepe patut sampun polih wak-wakan antuk Prajuru-Prajuru ring genahe maseserep.

PAWOS 62

1. Manut pamargin dresta sang lanang yogya marabi adiri sawawaning wenten pasubayan kawehin antuk rabine pingrihin, ping kalih manut sakadi Undang-Undang Pemerintah Agunge.
2. Yan wenten jadma istri bajang mobot, patut digelis kasadokang / tur kasakapang ring sang mobotang. prade sang mabotin, tan manut, wang inucap keni pamidanda manut pararem saha patut ngupakara rarene riwekas.
3. Prade tan wenten pariangken mobotin, sang mobot utawi kulawargannyane patut keni pangrebuan ring Bale Agung tur patut upakara rarene manut Agama.
4. Prade wenten wang mamitra ngalang / ngeker anak istri patut digelis mawiwaha yan tan mawiwaha, jadma inucap keni pamidanda smara dudu, prade yan kapurug wang inucap keni danda nikel utawi kadaut pipilnyane ring banjar.
5. Yan wang dratikrama, paradara lan salantur ipun, sane ngawinang cemer jagate, prade tan usan-usan malaksana kadi inucap patut keni pamidanda smara dudu, lan salantur ipun sakadi kecap ring ajeng.

6. Yan ngrangkat ngambil ngunggahang wangsa manut agama, wadone patut kaupakara patiwangi, katodya antuk Prajuru Banjar, wadone kapegang wangsa lan wangsa wus punika wawu mabyakala lan salantur ipun.

PALET 2

INDIK NYAPIHAN

PAWOS 63

1. Sang wus marabian, palas tan sida patut satinut alaki rabi, kabaos nyapihan. Yan wus marabian sangkaning kapademan kabaos balu.
2. Sang ayat pacang nyapihan taler mangda nganutin sane manut ring Undang-Undang / Awig-Awig sepatutnya patut atur supeksa ring sang rumawos, nunas pailekita, wastu tinas apadang indik pamargin nyapihan. Lantur I Prajuru nyarwakang ring Banjar utawi ring Desa saha patut pamarginniya, utawi masamsam ring Bale Agung.

PAWOS 64

1. Sulus pacang palas marabian wenten sangkaning:
 - 1). Pada lila pacang nyapihan.
 - 2). Sangkaning wicara utawi pratingkah sang siosan sane ngawinang tan prasida adung maparabian.
2. Yan prade palas saking tuas / lila sang nyapihan kaputusang kadi ring sor:
 - 1). Naur prebea ring sang rumawos.
 - 2). Polih pah-pahan pagunakayan.
 - 3). Pabekelan mawali niri-niri.
 - 4). Wewarisan kakuasa antuk kapurusa
 - 5). Anak-anaknya kakuasa antuk kapurusa.
 - 6). Patut nguwehin pangupa jiwa lan kaweruhan ring sentana.
3. Jalaran nyapihan tan pada lila utawi wit saking wicara luwire:
 - 1). Anyasar laku, paridara, dratikrama.

- 2). Kapunggelan idep rasa, utawi wandu.
- 3). Wakparusya wirosenglaku.
- 4). Macecala matilar tan pasadok, utawi tan maweh pangupa jiwa langkungan ring 6 (enem) sasih.
4. Prade kacihna tur kasadokang antuk sinalih tunggil manut sakadi jalaranniya parabian inucap wenang kapalasang. Sang sisip patut keni pamidanda manut pararem.
5. Sang nyapihan keni pamidanda ring desa, risampun katiwakin pamutus antuk sang rumawos manut jalaranniya nyapihan sakadi inucap ring ajeng.

PAWOS 65

1. Yan riwekas sang pecak nyapihan malih adung tur mawiwaha patut nglaksanayang pawiwahan manut pawos prabian ring ajeng.
2. Wang inucap keni pamidanda manut pararem saha patut kadulurin banten pamrascita.

PAWOS 66

1. Balu luh sane katinggal lampus antuk suaminniya utawi balu sane pecak nyeburin, patut ngmargiang swadarman kadi ring sor:
 - 1). Ngamenggehang kapatibratan tan paridara, dratikrama.
 - 2). Ngamarginin sahanan ayah krama.
 - 3). Ngraksa, nguasayang lan miara sahanan warisan lan paguna kayan kalih sentananniya.
 - 4). Tan kengin ngadol utawi ngediang warisan sawawaning polih kabebasan saking pakulewargan rabine saking kapurusa.
 - 5). Kengin ngidih sentana yan sampun mapidabdab sareng rabine pecak tur polih kabebasan saking kulawarga purusa.
 - 6). Kawenang malih mawiwaha yan sampun kapaigumin antuk oka deha truna lan kulawarga kapurusa.
2. Balu sane tan pageh ring swadarman luwire:
 - 1). Matingkah dratikrama, paradara lan selantur ipun.

- 2). Matilar tan masadok jantos langkungan ring 6 (enem) sasih.
- 3). Lempas ring swadarmaning balu / salah prawerti.
3. Balu sane tan pageh ring swadarman kadi ucap ring ajeng, prade kacihna manut ring tripremana salah prawertinniya wenang katundung olih warganniya kapurusa saha tan polih pahpahan waris.
4. Prade wenten balu tan pasentana utawi masentana pageh ring swadarma, katundung ring / olih warganniya kapurusa patut polih pah-pahan pagunakayan.

PALET 3

INDIK SENTANA

PAWOS 67

1. Sentana wenten kalih pawos, sane kaucap pretisentana lan sentana peperasan.
2. Sentana sane metu saking pawiwahan, sane sampun marupa sah puputin saksi sekala lan niskala kabaos pretisentana.
3. Yan sentana sane metu saking pawiwahan sane durung syah utawi pawiwahan durung kapatut wadone sampun mobot, sentana inucap patut kaupakara manut agama kapretisentana tur kasaksiang mangda tan kaucap leteh.
4. Prade saking pawiwahan tan prasida kawentenang sentana kengin ngadegang sentana utawi ngidih sentana. Kadulurang antuk upasaksi sekala lan niskala saha upakara peperasan kawastanin sentana peperasan.
5. Yan wenten krama madrebe pianak lanang asiki, tan dados pakidih. (kaangkat sentana).
6. Tan kawenang ngidih sentana jadmna sane sampun tedun makrama.

PAWOS 68

1. Ngadegang sentana manut dudonanniya patut makacihna antuk artabrana pamerasan, saha kasaksiang antuk prajuru, warga lan waris tur kamanggehang ring ilekita antuk prajuru tur kaupesaksi kapuputang yajnya pamerasanniya antuk Ida Sulinggih.
2. Sang pacang ngadegang sentana patut masadok ring I Prajuru asasih sadurung panemaya pamerasanniya, tur patut ngwentenang pasadu marep ring kulewarga warisnya.

3. Bendesa adat utawi kawakilin olih Klian Banjar patut ngerabang ring krama sawidangannya indik rencana sang pacang meras sentana.
4. Yan ana krama tan ninutin / utawi kababatan mangda ngadakang bawos pangandeg ring I Prajuru masengker tigang uku sabanen panemaya pamerasanniya.
5. Bendesa Adat digelis mawosin, saha ngicen panuntun utawi panepas manut ring catur dresta, muah manut daging parareman banjar.
6. Prade pamargin pacang meras tan kapialang wawu kapatut pacang kalaksanayang.
7. Prade wenten ngalangin, manut sulur kecaping ajeng, prajuru wenang ngandeg sang pacang meras, saha wenang maweh panuntun mangda tan wenten patungkas ring sesamanniya.

PAWOS 69

1. Pamerasan sane patut ring Desa Penasan luwire:
 - 1). Sampun patut mawidi wedana.
 - 2). Upacara kasaksinin olih prajuru adat lan dinas.
 - 3). Sampun manggeh ring ilekita.
2. Sane patut kaadegang sentana luwire:
 - 1). Krama maagama Hindu Dharma.
 - 2). Papernahan nedunang saking sang pacang nunas / meras.
 - 3). Kulewarga saking kapurusa.
 - 4). Prade tan wenten kaluwarga saking kapurusa kengin saking wadu. Prade saking wadu tan wenten wawu dados / kengin manut sesudian sang pacang meras (tunggil paibon).
3. Meras sentana kengin langkungan ring adiri lanang wiadin istri / wadon.

PAWOS 70

1. Swadarmaning sang sane meras sentana, patch ring swadarmaning guru rupaka, luwire:
 - 1). Maweh pangupa jiwa.
 - 2). Ngupakara manut Agama.
 - 3). Maweh ngutsahayang kaweruhan sentana.
 - 4). Ngupadi karahajengan sentana manut petitis grehasta lan salantur ipun.

2. Sang kasentanayang / kaadegang sentana swadarmanniya pateh ring swadarmaning sentana, setata ngupadi darmaning putra sesana.
3. Yan sang kalih inucap ring ajeng sinalih tunggil lepas ring sesana yogya kasadokang tur keni pamidanda manut pararem.

PALET 4

INDIK KAWARISAN

PAWOS 71

1. Sahanan tetamian arta brana, pusaka saha ayah-ayahan ngupadi kasukertan sekala lan niskala saking kaluhuranniya arep ring katurunanniya kabaos warisan.
2. Kang sinanggeh warisan luwire:
 - 1). Drue tengah. turun temurun saking kaluhuran: arta brana, kahyangan, Pusaka swakarma, tanah ayah-ayah, miwah sane siosan.
 - 2). Paguna kaya.
 - 3). Utang piutang.
3. Sane kabaos waris, pawarisan inggih punika:
 - 1). Sang kapiturun, kabaos pawaris.
 - 2). Katurunanniya, kabaos ahli waris.
 - 3). Arta brana miwah tetegenan lan ayah-ayah kabaos warisan.

PAWOS 72

1. Sane kengin manggeh ahli waris:
 - 1). Kaping ajeng prati sentana purusa utawi sentana rajeg lan sentana peperasan.
 - 2). Prade tan wenten sakadi turunan purusa patut karereh papernahan ngunggahang makadi rerama pernah sesemetonan lan pepernahan rerama misan mindon.
 - 3). Turunan kasamping makadi misan mindon.
2. Swadarma ahli waris makadi ring sor:
 - 1). Ngamargiang / nyolidii ayah-ayah waris.
 - 2). Ngutsahayang utawi polih pah-pahan arta berana wewarisan.

- 3). Ngrempon Kahyangan mrajan / pura tetinggalan warisan saha ngupakara.
- 4). Nglaksanayang sahanan Pitra Yajnya leluhur.
- 5). Nawur / nanggenin utang piutang pawaris antuk katinggalan pawaris utawi antuk guna kaya.

PAWOS 73

1. Pawarisan kengin kepah-pah sareng sesamannya sang patut ngwaris risampun swadarmaning ahli waris punika kapuputang makadi luwire:
 - 1). Muputang Pitra Yajnya pawaris / leluhur.
 - 2). Nawurin utang piutang.
 - 3). Nylidiin sahanan ayah-ayahan.
2. Pah-pahan warisan patut mangda pada arep ring sinalih tunggil waris manut tingkatannya lan dudonannya.
3. Yan tetinggalan gunakaya pah-pahan taler kengin nganutin pasubaya pawaris sadawegniya maurip utawi nganutin surat wasiat.
4. Sentana rajeg / wadon polih pah-pahan atengah saking pahan sentana purusa.
5. Sane tan patut polih pah-pahan:
 - 1). Alpaka Guru Rupaka.
 - 2). Nilar Agama lan sahanan kawitan.
 - 3). Sentana rajeg kesah mawiwaha, kaperas kaadegang sentana antuk anak siosan lan sang nyeburin, ika ngaran ninggal kadaton.
 - 4). Sang lumaksana kadi ucaping ajeng patut ngwaliang pah-pahan warisan sane pecak katerima.
 - 5). Sane kapatut tan polih pah-pahan sakewanten polih muponin pah-pahan warisan sakadi ring sor:

1. Sang mulih deha, mulih truna, riantukan duk pawiwahanniya kaucap ninggal kadaton.
 2. Balu luh sane pecak kawiwahang antuk sentana peperasan.
 3. Balu muani nyeburin.
 4. Sentana luh sane prade lokika sanggraha, tan kesah mawiwaha mawastu mapianak sentananniya kengin wantah ngwaris pagunakaya biange.
6. Pawaris kengin tur kapatut mapaweh duk kari urip arep ring ahli waris:
- 1). Paweweh jiwa dana, utawi pabekel tatadan ring ipianak sane kesah mawiwaha.
 - 2). Paweweh padgatakala.
 - 3). Paweweh pedum pamongan / reraksan warisan padgatakala arep ring ahli waris.

PAWOS 74

1. Prade yan sajeroning pakulawargan wenten ahli waris lintangan ring adiri, sesamen ahli waris punika patut kawentenang pah-pahan. Tingkahe pacang ngedum waris manut sakadi ring sor:
 - 1). Ngwentenang paiguman indik pedum waris.
 - 2). Yan tan sida igum patut nunas patimbang kerta desa (prajuru-prajuru banjar lan Bendesa Adat).
 - 3). Yan tan molihang kadi kaapti tan cumpu ring panepas kerta desa, wawu nunas raris ring sane rumawos ngwentenang Wicara.
2. Yan ana pacang nunas patimbangan ring kerta desa, prajuru-prajuru Desa patut nureksa sila-sila manut ilekita tur niwakang panepas sane kapatutang kadi ring sor:
 - 1). Pertama ring ahli waris purusa.
 - 2). Waris pepernahan ngunggahang.
 - 3). Waris pepernahan kasamping.
 - 4). Prade tan wenten kadi ucaping ring ajeng, kengin katiwakang ring katurunan wadon.
 - 5). Prade tan ana raris ring wang sekama-kama (tunggal paibon).

3. Prade yan ana jantos ngepah tegal carik utawi karang-ayahan banjar, sowang-sowang ahli waris inucap patut katedunang ngamarginin ayahan krama banjar ngarep.

SARGA VI

WICARA LAN PAMIDANDA

PALET 1

INDIK WICARA

PAWOS 75

1. Sane wenang mawosin utawi mutusang wicara ring desa adat Penasan inggih punika sang kapianggeh kerta Desa putusing prajuru-prajuru banjar.
2. Putusan panepas nganutin awig-awig desa petitis lan pamikukuh banjar.
3. Prade wicara tan prasida molihang pamutus ring Desa sang mawicara kengin nunas ring sang rumawos utawi ring pemerintah Agunge.

PAWOS 76

1. Sahanan Wicara sane mawiwit saking laksana corah, baya, nungkas awig-awig sane mawesana ngaroareng jagat utawi Banjar patut di gelis kabawosin antuk prajuru-prajuru Banjar.
2. Sejaba wicara kadi ring ajeng patut ngantosang pasadok saking sang nunas bawos.
3. Panepas patut pastika.
 - 1). Pastika nyantenang iwang.
 - 2). Tan maren nepek / ngeninin ring indik catur dresta (Sastra Dresta, Purana Dresta, Loka Dresta, muang Desa Dresta).

PALET 2

INDIK PAMIDANDA

PAWOS 77

1. Desa utawi Banjar wenang niwakang pamidanda ring warga sane sisip.

2. Patetiwak / matetiwak pamidanda kalaksanayang olih Bendesa Adat utawi Prajuru-prajuru Banjar:
3. Bacakan pamidanda luwire:
 - 1). Ayah-ayah panukun kasisipan.
 - 2). Danda arta (dedosan saha panikel-panikelanniya, utawi panikel paturunan).
 - 3). Pangupakara / pangaskara.
 - 4). Rerampagan.
 - 5). Kadaut tanah ayahan banjar.
 - 6). Lan pamidanda siosan.
4. Geng Alit pamidanda sane katiwakang masor singgih manut kaiwang an utawi sisipnya manut putusan pararem.
5. Sahanan jinah utawi rajabrana saking pamidanda kapianggeh druwen banjar.

PAWOS 78

1. Yan wenten prade krama sane langkung ring tigang paruman amandel tan anawur paturunan utawi dedosan panikelanniya wenang karampag.
2. Tatacara nglaksanayang rerampagan, manut kadi ring sor:
 - 1). Kadulurin antuk pasadok Prajuru arep ring sang pacang karampag.
 - 2). Pamargi ngrampag kalaksanayang olih I Prajuru kasarengin olih krama saakehnya 5 (limang) diri pinaka saksi lan ngromba I Prajuru.
 - 3). Sang ngrampag mangda sangkaning darsana ngambil barang rerampagan utawi nyawenin tanem tuwuh saakehnya manut ring utang sang karampag.
 - 4). Rerampagan kamanggehang ring ilekita tur kasaksiang.
 - 5). Prajuru miteketin sang karampag mangda digelis nebus sadurung waneng 9 (sie) rahina.
 - 6). Lelangan punika kaanggen nuku utangniya ring Banjar utawi ring Desa tur kawewehin antuk prabea rerampagan, sisanniya kawaliang ring sang karampag.
3. Tan kapatutang / tan kawenangang ngrampag barang-barang sane ngawinang mademang pangupa jiwa sang karampag.

4. Yan sang karampag ngalangin pamargi rerampagan inucap, wang inucap macihna tan nganutin awig-awig banjar adat lan patitis Desa, lempas ring swadarmaning krama, wang inucap wenang kadaut pipilnya ring banjar saha kadaut karang lan ayahanniya, antuk krama banjar wang inucap kabaos nora tur tan polih pangayoman krama banjar.
5. Pamidanda sisip kadi ring ajeng prasida purna buntas tinas apadang, yan sang sisip sampun:
 - 1). Nunas geng sinampura ring krama banjar, riantuk purun nguak pasubayan (Paswara ring pararem).
 - 2). Nawur pamidanda panguak swara, nawur pamidanda geng arta duk pacang karampag, tur mapaweweh maapah dasa manut sasihan lamine mautang rerampagan kadi ucaping ajeng tur wang inucap mewali katerima sakadi krama Banjar.

SARGA VII

NGUWAH KALIH NGUWUHIN AWIG-AWIG

PAWOS 79

1. Nguwah kalih nguwuhin awig-awig puniki patut kalaksanayang antuk paruman Desa Adat Penasan.
2. Paruman inucap patut kadasarin antuk gilik sadulur paiguman parareman krama Desa.
3. Papatutan bebawosan prasida yan sampun kramane gilik sadulur utawi kengin majalaran paswara (wewilangan swara).
4. Yan madasar wewilangan swara gaguatnya kadi ring sor:
 - 1). Krama Desa sane parum sanistanniya kalih pahan saking sane tan rawuh.
 - 2). Swara / wewilahan swara sane nganutin sanistanniya kalih pahan saking wewilahan swara sane sareng parum utawi mamilih.

PAWOS 80

Pangrencana peparuman indik pacang nguwah-uwuhin awig-awig kadi ring ajeng kengin kamedalang antuk I Bendesa, Klijan Banjar patus utawi saking krama niri-niri utawi sinarengan.

SARGA VIII

PAMUPUT

PAWOS 81

1. Awig-awig puniki kawastanin: AWIG-AWIG DESA ADAT PENASAN.
2. Awig-awig puniki kamargiang ngawit saking kararemin antuk krama Desa Adat Penasan.
3. Awig-awig Desa Penasan puniki manggeh tur kalaksanayang ring sajeroning wewidangan Desa Penasan, sakadi kecap ring ajeng: Pawos 11.1. ring ajeng.
4. Awig-awig Desa Penasan puniki ngeninin sehanan warga lan krama Desa Penasan lan sahanan sane kekuwub antuk Desa Adat Penasan.

PAWOS 82

1. Sakaluwir pamargi sane wenten sadurungniya patut kaanutang ring sadaging awig-awig puniki.
2. Sakaluwir pamargi pakraman sane durung kabaos utawi durung munggah sajeroning awig-awig puniki manggeh kalaksanayang manut tatacara sane sampun katah mamargi kaduluran antuk pararem / peparuman desa.

PAWOS 83

1. Awig-Awig puniki kararemin duk rahina peparuman Krama Desa Adat Penasan ring rahina: Wraspati Wara Landep, Purnamaning Sasih Karo, Icaka Warsa 1904, Tahun Masehi: Senin, tanggal 5 Agustus 1982.

Kalingga tanganin olih:

Bendesa Adat

(I Nyoman Nesa)

Prajuru - prajuru banjar:

1. I Wayan Sadnya (.....)
2. I Nengah Suja (.....)
3. I Nyoman Tjandri. (.....)

LEPIHAN 1.

Cakepan Awig-Awig Puniki Katedun Manut Sakadi Daging nyane
Duk Rahina Buda Kliwon Pagerwesi, Purnamaning Sasih Sadha

Uku Sinta, Isaka Warsa 1926

Tahun Masehi: Rabu, Tanggal 2 Juni 2004

KATEDUN OLIH:

PRAJURU DESA ADAT PENASAN:

1. Bendesa Adat Penasan : I Nyoman Candra
2. Petajuh : I Wayan
3. Penyarikan : I Ketut Santa
4. Petengen : I Wayan Sudanta

PRAJURU BANJAR ADAT:

Kelihan Banjar Penasan Tengah

1. (Made Parya)
2. (Drs. I Made Kaneka. S)
3. (I Made Sumiana)
4. (Ketut Kintir)

Kelihan Banjar Penasan Mungguna

1. (I Wayan Lugra)
2. (I Made Sudiana)
3. (I Wayan Subadra, SH)
4. (I Nyoman Sudita)

Kelihan Banjar Penasan Sangging

1. (I Mengah Suya)
2. (I Wayan Jaga)
3. (Ketut Sarita)
4. (I Ketut Suparta)